

Dr. Musli Vërbani

MELAQET E ZOTIT XH.SH.

Kaçanik, 2016

Planprogrami i muslimanit të vogël

Autori:

Dr. Musli VËRBANI

Titulli:

MELAQET E ZOTIT XH.SH.

Të drejtën e ribotimit e rezervon botuesi

DUA QË MUSLIMANI TË JETË:

1.	A tdhetar	19.	N dihmëtar i të varfërve
2.	B esimtar i sinqertë	20.	N jerëzor dhe Humanitar
3.	C ilësor	21.	O bjektiv
4.	Ç lirimtar	22.	i P a thyeshëm si shkëmb
5.	i D ashur për të gjithë	23.	i Q ëndrueshëm si Feniksi
6.	i D himbshëm për çdo kënd	24.	R evolucionar
7.	E dukues i shoqërisë	25.	R regullues i marrëdhënieve shoqërore
8.	i Ë mbël në biseda	26.	S imbol dhe sypatrembur
9.	F alënderues i Allahut	27.	Sh ëmbëlltyrë për të tjerët
10.	i G ëzuar dhe i lumtur	28.	T ejpamës i problemeve
11.	G jenerator i të mirave	29.	i Th jesht dhe modest
12.	H ero në beteja	30.	U dhërrëfyes për në rrugën e drejtë
13.	Ideator i zgjedhjes së problemeve	31.	V ullnetmirë i shoqërisë
14.	J etik i veprave të mira	32.	X ixëllonjë i shpresave
15.	K reator	33.	X hevahir
16.	i L umtur	34.	Y ll
17.	L logaritar i veprave të tij	35.	Z emërbutë
18.	M ënjauës i të këqijave	36.	Zh dukës i të keqes dhe zhvillues i të mirës

**Lutju Zotit dhe thuaj: “O Zoti im
shtoma diturinë.”**

Kur'an

***“O Zoti im më pajis me dituri të dobishme, më jep
furnizim të begatshëm,
mi prano veprat e mia.”***

Hadith

(شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ قَانِمًا بِأَلْقِطِ
لَا إِلَهَ إِلَّا هُوَ الْعَزِيزُ الْحَكِيمُ).

“Allahu dëshmoi dhe vërtetoi se nuk ka zot tjetër përveç Tij, e dëshmuar edhe engjëjt e dijetarët, dhe se Ai është zbatues i drejtësisë. Nuk ka zot përveç Tij Fuqplotit e të Urtit”. (Ali Imran, 18)

(لَقَدْ جَاءَكُمْ رَسُولٌ مِّنْ أَنْفُسِكُمْ عَزِيزٌ عَلَيْهِ مَا عَنِتُّمْ حَرِيصٌ عَلَيْكُمْ
بِالْمُؤْمِنِينَ رَءُوفٌ رَّحِيمٌ).

**“Juve ju erdhi i dërguar nga lloji juaj, atij i vjen rëndë për vuajtjet tuaja, sepse është lakmues i rrugës së drejtë për ju, është i ndjeshëm dhe i mëshirshëm për besimtarët”.(Et-
Tevbe : 128)**

Hyrje

Nga Umeri radijallahu anhu, transmetohet se ka thënë:

“Një ditë ishim duke ndenjur te i Dërguari i Allahut s.a.v.s., kur u duk një njeri me rroba shumë të bardha dhe flokë shumë të zeza. Në të nuk hetoheshin shenjat e udhëtimit dhe askush prej nesh nuk e njohëm. U ul pranë të Dërguarit, s.a.v.s. duke i mbështetur gjunjët e vet mbi gjunjët e tij, i vendosi duart e veta mbi kofshën e tij dhe pyeti:

O Muhamed, më trego ç’është Islami? Muhamedi a.s. iu përgjigj:

Islami është: - të dëshmosh se nuk ka zot tjetër përveç Allahut dhe se Muhamedi është i dërguar i Zotit,

- ***të falësh namazin,***
- ***ta japësh zekatin,***
- ***ta agjërosh ramazanin,***
- ***ta kryesh haxhin në Kabe, nëse ke mundësi.***

Ai pohoi: **Të vërtetën e the.** Ne u çuditëm! Po e pyet dhe po ia vërteton. Pastaj pyeti: Më trego çka është Imani? Muhamedi a.s. iu përgjigj: - ***Imani është të besosh Zotin,***

- ***Melekët e Tij,***
- ***Librat e Tij,***
- ***Të dërguarit e Tij,***
- ***Ditën e fundit,***
- ***Të besosh në të caktuarit e Tij, të mirës dhe të keqes.*** Ai pastaj

tha: **Të vërtetën e the.**

- Më trego ç’është Ihsani-Mirësia?
- Muhamedi a.s. iu përgjigj:
- ***Ta adhurosh Zotin sikur e sheh Atë, sepse, edhe pse ti nuk e***

sheh Atë, Ai vërtetë të sheh ty. Pastaj pyeti: Ç’është çasti i Kijametit?

Muhamedi a.s. iu përgjigj: ***Për këtë i pyeturi nuk di më shumë se ai i cili pyet.*** Më trego mbi shenjat e tij. Muhamedi a.s. iu përgjigj:

- ***Kur robëresha t’i lind vetes zonjushë.***
- ***Kur të shihen barinjtë këmbëzbathur, të zhveshur e të mjerë se si garojnë në ndërtimin e godinave të mëdha.*** Pastaj shkoi kurse unë mbeta i habitur, e Muhamedi a.s. tha: - ***O Umer a e njohe atë që më pyeti.*** Allahu dhe i Dërguari i Tij e dinë më së miri - iu përgjigja.

Muhamedi a.s. tha: ***Vërtet ky ishte Xhibrili, erdhi tua mësojë fenë tuaj.***” (MUSLIMI)

BESIMI NË MELAQET E ZOTIT

Muslimani i dëgjon, i beson dhe i vërteton fjalët e Zotit të Madhëruar.

Zoti i Madhëruar në Kur'an thotë:

“Ka besuar i dërguari ç’ka i ka zbritur prej Zotit të tij. Të gjithë (pejgamberët edhe besimtarët) kanë besuar Allahun edhe në melaqet e Tij”.

Besimi në melaqet e Zotit nënkupton: Se melaqet ekzistojnë, janë të krijuara prej drite, nuk hanë, nuk pinë, nuk martohen. Pra, besimtari vërteton ekzistencën e tyre si krijesa të Allahut, ashtu siç e tregon Kur’ani vlerën, qëllimin dhe rëndësinë e tyre.

E kanë pyetur Muhamedin a.s.: Çka është Imani? Muhamedi a.s. është përgjigjur:

Me besua në Allahun, në melaqet e Tij, librat e Tij, në pejgamberët e Tij.

Pyetje:

- 1. Çka nënkupton besimi në melaqet e Zotit?*
- 2. Si është përgjigjur Muhamedi a.s. kur e kanë pyetur për Imanin?*

CILËSITË E MELAQEVE

Melaqet kanë cilësi të posaçme me të cilat dallohen prej krijesave tjera.

Cilësitë e tyre janë:

- Trupi i tyre është i krijuar prej drite.
- Nuk hanë, e as nuk pinë.
- Nuk flenë.
- Nuk martohen.
- Nuk i kundërshtojnë kurrë urdhrat e Allahut.
- Kanë krahë nga dy, nga tre apo nga katër.
- E lavdërojnë dhe e përkujtojnë Allahun deri në Ditën e Kijametit.
- Na shohin neve ndërsa ne nuk i shohim.
- Janë të shpërndara në qiell dhe në tokë.
- Të gjithë besojnë dhe nuk tregojnë kryelartësi.
- Mund të paraqiten në forma të ndryshme.

Pyetje:

- 1. Cilat janë cilësitë e melaqeve?*
- 2. A na shohin melaqet?*
- 3. Ku janë të shpërndara melaqet?*
- 4. Si paraqiten melaqet?*
- 5. A kanë melaqet forma të njëjta?*

PUNËT E MELAQEVE

Ka shumë lloje të melaqeve dhe numri tyre është shumë i madh. Zoti i Madhëruar për secilin lloj të melaqeve ka parapa (ka caktuar) punë të veçantë.

- Disa prej tyre i shënojnë dhe i regjistrojnë veprat e njerëzve.
- Disa i ka autorizuar për rojtarë të Xhenetit dhe Xhehenemit.
- Disa e mbajnë “**Arshin**” e madh.
- Disa sillen rreth e përqark “**Arshit**” të madh.
- Disa i mbrojnë njerëzit nga e keqja e shejtanëve dhe e xhinëve.
- Ndonjëri e zbret “**Vahjin**” (Librat) prej Zotit të Madhëruar te pejgamberët.
- Ndonjëri është i autorizuar me zbrit furnizimin (**rizkun**) prej qiellit.
- Disa e lavdërojnë Allahun pandërprerë ditë e natë.
- Ndonjëri prej tyre do t’i fryj “**Surit**” në Ditën e Gjykimit.
- Disa prej tyre janë të autorizuar për erërat dhe mjegullat.
- Disa janë të autorizuar për marrjen e shpirtrave.
- Disa janë të autorizuar që të bëjnë dua, dhe të kërkojnë falje për besimtarët.
- Disa janë të autorizuar për mbikëqyrjen e kodrave.

Secili e kryen detyrën ashtu siç ia ka caktuar Zoti i Madhëruar, i kryejnë detyrat me përpikëri dhe nuk kundërshtojnë.

Pyetje:

1. *A është i njohur numri i melaqeve?*
2. *Cilat janë punët e melaqeve?*
3. *Si i kryejnë detyrat melaqet?*

MELAQET E DALLUARA

Zoti i Madhëruar ka vlerësua disa melaqe më shumë se melaqet e tjera ashtu siç i ka vlerësua disa pejgamber më shumë se pejgamberët e tjerë.

Allahu e vlerëson kë të do Ai.

Pra, prej të gjitha melaqeve Zoti i ka dallua katër melaqe, e ato janë:

1. **Xhibrili**
2. **Mikaili**
3. **Meleкул mevt**
4. **Israfil**
- 5.

Zoti i Madhëruar në Kur'anin fisnik thotë:

“Kush mundet me qenë armik i Xhibrilit deri sa ai ta ka zbritur Kur'anin në zemrën tënde që ishte dëshmuës dhe vërtetues i asaj çka ka zbritur më parë dhe udhëzues e gjithashtu edhe përgëzues i besimtarëve. Kush është armik i Allahut, i melaqeve të Tij, i Xhibrilit i Mikailit (ai është pabesim) dhe pa kurrfarë dyshimi Allahu është armik i mosbesimtarëve”. (El – Bekare : 97, 98)

Pastaj prej këtyre katër melaqeve të rëndësishme Zoti e ka vlerësua më së shumti Xhibrilin.

Pyetje:

1. *Cilat melaqe i ka dalluar Zoti i Madhëruar nga melaqet tjera?*
2. *Çka thotë Zoti i Madhëruar për Xhibrilin?*
3. *Çka thotë Zoti i Madhëruar për ata të cilët janë armiq të melaqeve?*

ERR-RUHUL EMINË

Ruhul Eminë apo “**Shpirti Besnik**” është emër i melaqes **Xhibril**.

Xhibrili është imam i melaqeve. **Xhibrili** i ka zbritur të gjitha librat qiellor te peygamberët. Pra, Xhibrili ia ka zbritur Vahjin secilit në kohën e tij, për popullin e tij për t’i plotësuar nevojat e secilit popull.

Muhamedi a.s. Xhibrilin e ka parë në forma të ndryshme.

Nuk është për tu habitur pse melaqet paraqiten në forma të ndryshme.

Njëherë i Dërguari a.s. ka kërkuar për ta parë në formën e tij të vërtetë hyjnore!

Me lejen e Allahut, Muhamedi a.s. e ka parë se si krahët e Xhibrilit të shtrirë gjerë e gjatë në horizontin e gjerë gati sa i ka përfshirë lindje e perëndim.

Herën tjetër e ka parë në Natën e Miraxhit në Sidretul Munteha. Thotë Zoti i Madhëruar në Kur’anin Fisnik:

“E ka parë edhe herën tjetër. Në Sidretul Munteha”.

Pra, Xhibrili pasi që ia ka zbritur Kur’anin Muhamedit a.s. si dhe çdo shpallje peygamberëve tjerë e meriton të quhet “**RUHUL EMINË**” apo **Shpirti Besnik**.

Të mësojmë edhe ne prej Xhibrilit besnikërinë dhe të gjitha detyrat tona t’i kryejmë me përpikëri dhe me besnikëri.

Pyetje:

- 1. Kush është Ruhul Eminë?*
- 2. Kush është Xhibrili?*
- 3. Çka ka zbritur nga qielli Xhibrili?*
- 4. A e ka parë Muhamedi a.s. Xhibrilin?*
- 5. Çka duhet të mësojmë nga Xhibrili?*

MELAQJA E RISKUT (Furnizimit)

Secili njeri e ka të caktuar sa i nevojitet furnizimi gjatë jetës së tij.

Këtë “risk” apo furnizim e ka regjistruar dhe e ka shënuar **Mikaili** në momentin e lindjes së secilit njeri, pse për këtë e ka autorizuar Zoti i Madhëruar.

Na tregon shoku i Muhamedit a.s. Ibni Mes’udi se Muhamedi a.s. ka thënë:

“Secilit prej juve formimi i embrionit në barkun e nënës vjen me fazën e parë për dyzetë ditë bëhet farë embrioni, pastaj për dyzetë ditë tjera bëhet gjak, pastaj dyzetë ditë tjera bëhet mish, pastaj dërgohet një melek ia jep Shpirtin dhe urdhërohet për katër çështje:

- *për regjistrimin, shënimin e riskut apo furnizimit,*
- *për caktimin e exhelit, jetës së tij,*
- *për caktimin e veprimtarisë së tij dhe*
- *për caktimin se a do të jetë besimtar apo jobesimtar (fatkeq).*

Pyetje:

1. *Kush e ka të regjistruar “Rizkun” apo furnizimin?*
2. *Kur melekua ia jep shpirtin (fëmijës në barkun e nënës) çka është i urdhëruar që të regjistrojë?*

ISRAFILI

Meleku fisnik **Israfili** është melaqja e cila do t'i fryjë **“SURIT”** kur të ndodhë Dita e Kijametit, pastaj do t'i fryjë herën tjetër dhe njerëzit ngrihen nga varret për të dhënë llogari për veprat e tyre.

Thotë Zoti i Madhëruar:

“Pastaj i fryhet **“SURIT” herën tjetër dhe menjëherë të gjithë ata (njerëzit) në këmbë presin (urdhrin e Zotit për tu gjykuar për veprat e tyre). (El-Zumer : 68)**

Muhamedi a.s. ua përkujtonte shokëve të tij këtë melaqe fisnike dhe u tregonte për çështjen e tij dhe për detyrën e tij.

Një ditë derisa ishte ulur u tha shokëve të tij:

“Si do të jetë puna me ju atë ditë derisa melaqja e ka përgatitur **“SURIN”** i ka hapur krahët dhe është përgatitur me e dëgjua urdhrin e Zotit dhe pret me i fry SURIT”.

Shokët thanë: “Na mjafton Allahu. Ai është mbrojtësi më i mirë. Vetëm Allahut i mbështetemi”.

Vazhdimisht të themi: **“HASBUNALLAHU VE NIË’MEL VEKIL dhe ‘ALALL-LLAHI TEVEKKELNA”** që në gjuhën shqipe d.m.th.: “Na mjafton Allahu, Ai është mbrojtësi më i mirë, vetëm Allahut i mbështetemi.”

Këto dy fjali janë armët më të forta për tu siguruar nga trishtimi i fryrjes së **“SURIT”** në Ditën e Kijametit.

Pyetje:

- 1. Kush është meleku Israfil?*
- 2. Çka i thanë shokët Muhamedit a.s. kur i tregoi për **“SURIN”**?*
- 3. Cilat fjale janë armët më të forta për t'u siguruar nga trishtimi i SURIT?*

MELAQJA E AUTORIZUAR PËR MARRJEN E SHPIRTRAVE

Melaqja e autorizuar për marrjen e shpirtrave quhet “**MELEKUL MEVT**”, për këtë arsye kjo melaqe ka rëndësi të madhe dhe është melaqe fisnike.

Thotë Zoti i Madhëruar:

“Thuaj: U bënë që të vdisni Melaqja e marrjes së shpirtrave, i cili është i autorizuar për ju (që tua marrë shpirtin)”. (Es-Sexhde : 11)

MELKUL MEVTI i ka ndihmëtarët e vet të cilët i ndihmojnë në kryerjen e detyrës, këtë na e tregon Zoti i Madhëruar në Kur’anin fisnik:

“Dhe, Ai (Allahu) është i fuqishëm mbi robërit e Tij dhe gjithashtu u dërgon mbrojtës deri në momentin kur ndonjërit prej juve i vjen vdekja, ia marrin shpirtin të dërguarit Tanë e ata nuk bëjnë kurrfarë lëshimi”. (El-En’am : 61)

Atij që është besimtar, **Melekul Mevti** i vjen në formë të mirë, me erë të mirë, me rroba të bardha dhe e përgëzon me kënaqësinë e Allahut dhe i tregon se edhe ai do të jetë i kënaqur me Allahun.

Jobsimtarit, **Melekul Mevti** i vjen në formë të trishtueshme dhe e lajmëron për pakënaqësinë e Allahut dhe dënimin të cilin do ta përjetojë.

Melekul Mevti ka fuqi të madhe, për këtë arsye i merr shpirtrat në momentin e caktuar ashtu siç është i autorizuar.

Kur është pyetur Ibni Abasi: “Nëse një njeri vdes në lindje e tjetri në perëndim në të njëjtën kohë, atëherë si është e mundur që Melekul Mevti me ja marrë shpirtrat menjëherë”?

Ibni Abasi thotë: “Fuqia e Melekul Mevtit për lindje a perëndim, dritë e errësirë, tokë e det është sikur njeriu i cili ka tavolinën (tryezën) përpara dhe çka dëshiron, si dëshiron dhe kur të dojë merr”.

Melekul Mevti është melaqe fisnike, ai ka autorizim prej Zotit, ai nuk ka gabim (mëkat) pse i merr shpirtrat. Ne duhet ta respektojmë emrin e tij sepse Melekul Mevti nuk na shkurton jetën, nuk na e pengon furnizimin por vetëm i kryen urdhrat.

Pyetje:

1. *Cila është melaqja e cila i merr shpirtrat?*
2. *Si i vjen Melekul Mevti jobsimtarit?*
3. *Si i vjen Melekul Mevti jobsimtarit?*

MBIKËQYRËSI I XHENETIT DHE I XHEHENEMIT

Secili nga ne e dëshiron Xhenetin, shpresojmë në Allahun që të na bëjë prej banorëve të Xhenetit.

Secili nga ne frikësohet nga Xhehenemi, prandaj e lusim Allahun që të na largoj prej atij dënimi.

Zoti i Madhëruar ka autorizuar po ashtu mbikëqyrës për Xhenet dhe për Xhehenem.

Melaqja e autorizuar për Xhenet është **“RIDVANI”** e ai i ka edhe ndihmësit e tij, ata i përgëzojnë dhe i urojnë besimtarët dhe besimtare, muslimanët dhe muslimanet kur të hynë në Xhenet.

Thotë Zoti i Madhëruar:

“Nuk i pikëllon ata (besimtarët) trishtimi i madh por i takojnë melaqet e u thonë: Kjo është dita e cila iu është premtuar juve”.

Thotë Zoti i Madhëruar:

“Melaqet u hynë atyre nga secila derë, e u thonë: ”Selamun alejkum” për atë që keni duruar. Nuk ka finalizim më të mirë se kjo, aty ka vendbanime të mrekullueshme”.

Rojtari i Xhenetit quhet **RIDVAN**.

I pari i cili do ta hapë derën e Xhenetit është Muhamedi a.s. Thotë Enes bin Maliku se Muhamedi a.s. ka thënë:

“Do t’i afrohem derës së Xhenetit, do ta hapë, ndërsa rojtari thotë: Kush është? Do të them: Muhamedi. Thotë rojtari: Për ty jam urdhëruar me të lejua me e hapë këtë derë, e nuk mund që ta hapë askush para teje”.

Zoti i Madhëruar rojtarin e Xhenetit e ka quajtur **RIDVAN** sepse ai është i kënaqur me banorët e xhenetit. Prandaj **RIDVAN** d.m.th. i **kënaqur**.

Ndihmësit e tij qëndrojnë para dyerve të Xhenetit dhe i thërrasin besimtarët dhe besimtare, muslimanët dhe muslimanet që të hynë në Xhenet varësisht prej veprave të tyre:

Kush falë namaz thirret nga dera e namazit. Kush ka bërë xhihad thirret nga dera e xhihadit. Kush ka agjëruar thirret nga dera e agjërimit (Rejan). Kush ka dhënë sadaka thirret nga dera e sadakës.

Disa thirren nga të gjitha dyert e lartpërmendura.

Melaqja e autorizuar për mbikëqyrjen e Xhehenemit quhet **“MALIK”**. Quhet kështu sepse kjo d.m.th. e ka përmbajtjen e të **“fuqishmit (të fortit)”**.

Zoti i Madhëruar për t'i ndëshkuar banorët e Xhehenemit Malikun e ka bërë të fortë dhe të fuqishëm. Ai i ka edhe ndihmësit dhe bashkëpunëtorët për t'i dënuar jobesimtarët.

Thotë Zoti i Madhëruar: **“Mbi të (Xhehenem) mbikëqyrin nëntëmbëdhjetë. Ne mbikëqyrës të zjarrit të Xhehenemit nuk kemi përcaktuar tjetër përpos melaqet. Dhe numrin e përcaktuar të tyre nuk e kemi bërë për asgjë tjetër vetëm se për t'i sprovuar (ndëshkuar) ata të cilët nuk besojnë”**.

Thotë Zoti i Madhëruar:

“Mbi të (Xhehenem) janë melaqet e ashpra dhe të forta”

Të këqijtë ndëshkohen me zjarr së bashku me jobesimtarët. Pas ndëshkimit të rreptë ata dëshirojnë t'i shpëtojnë zjarrit dhe e thërrasin mbikëqyrësin e xhehenemit për t'i shpëtuar por ai nuk iu përgjigjet lutjes së tyre.

Thotë Zoti i Madhëruar:

“Ata që janë në zjarr u thonë rojeve të tyre në Xhehenem, luteni Zotin e juaj që të na lehtësojë neve një ditë prej dënimit. Melaqet e Xhehenemit thonë: A nuk iu kanë ardhur të dërguar prej mesit të juve me argumente të qarta. Banorët e Xhehenemit përgjigjen: Po gjithsesi, atëherë melaqet e Xhehenemit u thonë pra thirrni ata. Por lutja e jobesimtarëve është vetëm humbje e asgjë tjetër”.

Melaqet e xhehenemit quhen Zebanije.

Thotë Zoti i Madhëruar: **“Do t'i thërrasim Zebanijet (për t'i ndëshkuar banorët e Xhehenemit)”**.

Pyetje:

1. *Kush mbikëqyr Xhenetin dhe Xhehenemin?*
2. *Si quhet melaqja e Xhenetit?*
3. *Kush është i pari i cili e hapë derën e Xhenetit?*
4. *Pse quhet melaqja e Xhenetit “RIDVAN”?*
5. *Nga cilat dyer hyjnë besimtarët në Xhenet?*
6. *Si quhet melaqja e Xhehenemit?*
7. *A ka ndihmëtarë melaqja e Xhehenemit?*
8. *Pse ka ndihmëtarë melaqja e Xhehenemit?*
9. *Sa mbikëqyrës ka Xhehenemi?*
10. *A janë të ashpra melaqet e Xhehenemit?*
11. *A i pranohet lutja jobesimtarit për të shpëtuar nga dënimi i Xhehenemit?*

MELAQET E AUTORIZUARA QË TË NA PYESIN NË VARR

Zoti i Madhëruar i ka autorizuar dy melaqe për të na pyetur neve në varr për veprat tona dhe fenë tonë.

Posa të varroset i vdekuri i kthehet shpirti në trupin e tij, i vijnë dy melaqe dhe e pyesin:

- Kush është Zoti yt?

Besimtari thotë: **Allahu është Zoti im.**

- Cila është feja jote? **Feja ime është Islami.**

- Cili peygamber është dërguar te ju? **I Dërguari i Allahut-Muhamedi a.s.**

- Cila është dituria (libri) juaj?

Kam lexuar Kur'anin librin e Allahut, i kam besuar, vërtetuar dhe praktikuar në vepër.

Pastaj e pyesin cili është Zoti yt, feja jote dhe i dërguari yt.

Zoti i Madhëruar ia përforcon fjalët besimtarit dhe ai pa hamendje thotë: **Allahu është Zoti im, feja ime është Islami, peygamberi im është Muhamedi a.s.**

Nga qielli vjen një thirrje: E ka thënë të vërtetën robi im, shtroni shtrat të Xhenetit, visheni me rroba të Xhenetit, hapjani dyert e Xhenetit.

Nga brendia e shpirtit i vjen era e mirë, i zgjerohet gjendja dhe i zgjatet shikimi. I vjen një person me pamje të bukur, rroba të mira, erë të mirë e i thotë: Të përgëzoj me diçka të mirë, të përgëzoj me kënaqësinë e Allahut, Xhenetin me të mira të shumta dhe të përgjithshme dhe kjo është dita e premtuar.

Besimtari pyet: Ti që më përgëzon për të mira, kush je ti? Thotë: Unë jam vepra jote.

Pastaj i hapet dera e Xhenetit dhe e sheh vendin e tij në Xhenet.

Jobesimtari pasi të varroset i kthehet shpirti në trup, i vijnë dy melaqe dhe e pyesin:

- Kush është Zoti yt? **Jo, nuk e di!?**

- Cila është feja jote?

Nuk e di!?

- Cili peygamber është i dërguar te ju? **Nuk e di !?**

- Pastaj i thuhet: Nuk e dite, nuk ke njohuri për këto gjëra, për këtë arsye vjen një zë nga qielli e thotë: Shtroni shtrat të Xhehenemit dhe hapjani derën e Xhehenemit. I vjen nxehtësi e fortë, i shtrëngohet gjendja aq shumë sa që i pëlcastin edhe eshtrat. I vjen një person me fytyrë të keqe, rroba të këqija, erë të keqe dhe i thotë: Kjo është dita e premtuar, dita e ndëshkimit.

Jobesimtari i thotë: Kush je ti?

Unë jam vepra e jote e keqe. Pastaj verbërohet dhe shurdhohet.

Melaqet e autorizuara për në varr janë **Munkeri** dhe **Nekiri**.

Pyetje:

1. *Sa melaqe i ka autorizuar Zoti i Madhëruar për me na pyet në varr?*
2. *Çka ndodhë me të vdekurin kur të varroset?*
3. *A ia forcon fjalët Zoti i Madhëruar besimtarit në varr?*
4. *Çka ndodhë me besimtarin në varr?*
5. *Çka ndodhë me jobesimtarin në varr?*

MELAQET E AUTORIZUARA PËR MBAJTJEN E ARSHIT

Arshi është çështje më e lartë dhe më e madhe e krijesave.

Thotë Muhamedi a.s.: *“Nëse luteni, kërkonë prej Zotit të Madhëruar Xhenetin Firdevs, sepse Firdevsi është mesi i Xhenetit dhe prej Xheneteve më të larta dhe mbi të është “Arshi” i të Gjithëmëshirshmit dhe prej aty burojnë lumenjtë e Xhenetit”.*

Këtë Arsh madhështor e mbajnë melaqet fisnike. Ata gjithashtu e lavdërojnë, e falënderojnë dhe e besojnë Zotin e tyre, dhe nuk tregojnë kryelartësi por kërkojnë falje për besimtarët.

Thotë Zoti i Madhëruar:

“Ata (melaqet) të cilët e mbajnë Arshin dhe çka ka rreth tij e lavdërojnë dhe e falënderojnë Zotin e tyre dhe besojnë në Të dhe kërkojnë falje për ata të cilët besojnë: O Zoti ynë Ti ke përfshi çdo gjë me mëshirën dhe diturinë Tënde. Fali ata të cilët pendohen dhe pasojnë rrugën Tënde. Ruaj ata nga dënimi i Xhehenemit”.

Numri i atyre melaqeve të cilat e mbajnë Arshin janë tetë.

Thotë Zoti i Madhëruar: **“E mbajnë arshin e Zotit tënd, mbi ta (Arsh) atëherë do të jenë tetë”.**

Thotë Harunë bin Raiabi se bartësit e arshit janë tetë. Katër prej tyre thonë: **“SUBHANEKE VE BI HAMDIKE”** për butësinë pas diturisë Tënde. **“SUBHANEKE VE BI HAMDIKE”** për falje pas fuqisë Tënde.

Për fuqinë dhe mundësinë e melaqeve të cilat e mbajnë Arshin nuk di askush përpos Zotit të Madhëruar.

Pyetje:

1. *Çka është Arshi?*
2. *Çka është Firdevsi?*
3. *Kush e mban Arshin?*
4. *Çka thonë melaqet të cilat e mbajnë Arshin?*
5. *Sa është numri i melaqeve të cilat e mbajnë Arshin?*
6. *Si luten melaqet të cilat e mbajnë Arshin?*

MELAQJA E AUTORIZUAR PËR SHI

Zoti i Madhëruar ka caktuar melaqe për të zbritur shiun nga qielli që të ngjall tokën pasi të thahet, që toka të lulëzojë dhe të ringjallet pas vdekjes së saj.

Na tregon shoku i Muhamedit a.s. Ebu Hurejre se Muhamedi a.s. ka thënë:

Derisa një njeri shkante në një pjesë të shkretëtirës, e dëgjon një zë lart mbi mjegulla: Ujite bahçen (arën) e Allahut. Kur mjegullat u larguan dhe shkuan në drejtim të një are dhe e lëshuan shiun në të, pastaj u formua një përroskë nga ai ujë. Aty në arë qëndronte një njeri i cili me shatë e përcillte ujin ka dëshironte.

E pyeti njeriu pronarin e arës: Si e ke emrin? Kur ai u përgjigj me të njëjtin emër të cilin e kishte dëgjuar lartë mbi mjegulla atëherë i tha: Pse po më pyet për këtë? Ai tha: Kam dëgjuar një zë mbi mjegulla i cili thoshte të zbresin mjegullat shi mbi arën tënde. E pse kështu nuk e di! I tha: Pasi po më pyet po të tregoj: Unë pasi t'i mbledh të lashtat, një pjesë e jap sadakë, një pjesë e shpenzoj për veten dhe familjen time dhe një pjesë e shpenzoj për tokën.

Pra, me sadakë fitohet mëshira e Allahut, dhe Allahu na furnizon me të gjitha begatitë e natyrës dhe të tokës.

Pyetje:

1. Çka ka caktuar Zoti i Madhëruar për **shi**?
2. Çka fitohet me sadakë?

MELAQJA E AUTORIZUAR PËR KODRA

Melaqja fisnike e autorizuar për kodrat, kujdeset dhe i mban ato.

Për këtë na tregon Aishja r.a.: I kam thënë të dërguarit të Allahut se kur ka qenë dita më e vështirë për ty se sa dita e luftës në Uhud. E Muhamedi a.s. ka thënë: Kam përjetuar prej popullit tënd çka nuk kam përjetuar ditën më të vështirë deri në ditën e Kijametit. I kam paraqitur ftesë për besim fisit ABDU LEJL dhe nuk më është përgjigjur. U largova nga aty i pikëlluar deri sa arrita në një vend, kur e ngrita kokën e pashë se më kishin mbuluar mjegullat. Shikova, kur aty pashë **Melaqen e kodrave** i cili më tha: Zoti i Madhëruar ka dëgjuar për fjalët e këtij populli dhe se nuk të është përgjigjur në ftesë... Më ka dërguar Zoti yt që të veproj çka do që ti më urdhëron, nëse dëshiron i bashkoj këto kodra dhe përmbyti këtë fis”.

Muhamedi a.s. i ka thënë: *“Shpresoj se prej tyre do të dalin (pasardhës) të cilët do ta adhurojnë vetëm Allahun dhe që nuk i bëjnë shokë Atij”*.

Nga ky hadith kuptojmë:

1. Pejgamberët në rrugën e Allahut sprovohen në të gjitha mënyrat.
2. Zoti i Madhëruar ka autorizuar melaqe për kodra.
3. Zoti i Madhëruar iu përgjigjet nevojave të pejgamberëve.
4. Butësia e Muhamedit a.s. ndaj popullit të tij.

Pyetja:

1. Çka ka autorizuar Zoti i Madhëruar për kodra?
2. Çka i ka thënë Melaqja e kodrave Muhamedit a.s. kur nuk e ka pranuar ftesën fisi ABDU LEJL?
3. Çka i ka thënë Muhamedi a.s. Melaqes së kodrave?

MELAQET E AUTORIZUARA ME BË LUTJE PËR BESIMTARËT

Zoti i Madhëruar ka krijuar melaqe që të bëjnë dua për besimtarët.
Thotë Zoti i Madhëruar:

“E lavdërojnë dhe e falënderojnë Zotin e tyre dhe besojnë në Të dhe kërkojnë falje për ata që besojnë. O Zoti ynë i cili ke përfshi me mëshirë dhe dituri çdo gjë, fali ata të cilët janë penduar dhe pasojnë rrugën Tënde. Mbroj ata nga dënimi i Xhehenemit, o Zoti ynë futi në Xhenetin “ADN” të cilin u ke premtuar atyre dhe kush bën vepra të mira prej prindërve të tyre, bashkëshortëve (bashkëshorteve) të tyre dhe trashëgimtarët e tyre. Vërtetë Ti je i Fuqishëm. Pastroj nga të këqijat, kënd e pastron nga të këqijat vërtetë atë (atëherë) e ke mëshiruar. Kjo vërtetë për të është fitore e madhe”.

Nga ky lloj i melaqeve ka caktuar Zoti i Madhëruar me bë dua për njeriun i cili bën dua për vëllanë e tij kur ai është larg.

Thotë Ebu Dardai:

“Duaja e besimtarit për vëllanë e tij kur ai nuk është në prezencën e tij është e pranuar. Mbi kokën e tij qëndron një melaqe, beson dhe e dëgjon duanë për të mirë e thotë: “AMIN” edhe ty gjithashtu njësoj.

Të bëjmë dua për vëllezërit tanë e në të njëjtën kohë të fitojmë duanë e melaqeve mbi ne.

Pyetje:

- 1. Çka ka autorizuar Zoti i Madhëruar për besimtarët?*
- 2. Si luten melaqet për besimtarët?*
- 3. A duhet të bëjmë dua për vëllezërit tanë?*
- 4. Pse duhet të bëjmë dua për vëllezërit tanë?*

MELAQET E AUTORIZUARA PËR ME I SHËNUAR DHE REGJISTRUAR VEPRAT TONA

Zoti i Madhëruar ka autorizuar melaqet “Shkrues Fisnik” me i regjistrua veprat tona.

Thotë Zoti i Madhëruar: **“Jo, jo kurrresi jo! Po si po e mohoni Ditën e Kijametit. Ndërsa është e vërtetë se për ju (janë caktuar) rojtarët Shkrues Fisnik (ata) dinë çdo gjë çka veproni”**

Shkruesit fisnik i regjistrojnë veprat e mira e të këqija të njeriut, i shkruajnë edhe fjalët e njeriut pa marrë parasysh se çfarë fjale është ajo. Ato i shkruajnë në librin (ditarin) e njeriut në të cilin njeriu do të shohë çdo vepër të tij, të vogël apo të madhe në Ditën e Kijametit.

Zoti i Madhëruar ka caktuar njërën melaqe në anën e djathtë për t’i regjistruar veprat e mira. Ndërsa tjetrën në anën e majtë për t’i regjistruar veprat e këqija. Mirëpo këto janë në pajtim ashtu që melaqja në anën e djathtë veprën e mirë e regjistron menjëherë, ndërsa melaqja në anën e majtë nuk e regjistron menjëherë por në prezencë të melaqes në anën e djathtë. Këto dy melaqe nuk ndahen nga njeriu as ditën as natën dhe e shënojnë çdo fjalë që e flet njeriu.

Thotë Zoti i Madhëruar: **“Nuk flet (njeriu) asnjëherë e të mos jetë në prezencën e tij “Rekibi”, “Atidi”.**

“Rekibi” në anën e djathtë, “Atidi” në anën e majtë.

Këto shënojnë fjalët e mira apo të këqija ashtu që i shënojnë edhe fjalët si p.sh. hëngra, piva, shkova, erdha, shikova etj. Nëse vepron keq, flet keq e pastaj pendohesh sinqerisht atëherë melaqja në anën e majtë nuk e shënon.

Pyetje:

- 1. Kush i regjistron veprat tona?*
- 2. A i shkruajnë "Shkruesit Fisnik" edhe fjalët tona?*
- 3. Ku shkruhen veprat tona?*
- 4. A do t'i shoh njeriu veprat e tij?*
- 5. Çka shkruan melaqja në krahun e djathtë?*
- 6. Çka shkruan melaqja në krahun e majtë?*
- 7. A ndahen ndonjëherë melaqet të cilat i shkruajnë veprat nga njeriu?*
- 8. Si quhet melaqja në anën e djathtë?*
- 9. Si quhet melaqja në anën e majtë?*
- 10. Nëse vepron keq dhe pendohesh a e shënon veprën melaqja në anën e majtë?*

MELAQJA E AUTORIZUAR PËR MBROJTJEN E NJERIUT

Zoti i Madhëruar ka krijuar melaqe për ta mbrojtur njeriun nga çdo e keqe.

Thotë Zoti i Madhëruar:

“Ai (njeriu) ka përcjellës (të cilët ndërrohen për çdo ditë) para dhe pas e ruajnë atë me urdhrin e Allahut”.

Këto melaqe e ruajnë njeriun prej xhinëve dhe shejtanëve.

Pra, njeriu vazhdimisht ka përcjellës natën dhe ditën. Kur të përfundoj dita melaqet e ditës ngrihen lart në qiell dhe vijnë melaqet e natës dhe e ruajnë që të mos i ndodhë diç çka nuk i është shënuar atij. Nëse do me i ndodhë ndonjë fatkeqësi çka nuk i është shënuar atëherë ato e mbrojnë prej asaj fatkeqësie.

Thotë Ebu Hurejre:

Ka thënë Muhamedi a.s.:

Ndërrohen melaqet e natës dhe të ditës në namazin e sabahut dhe të ikindisë. Kur të ngrihen melaqet në qiell (Zoti e di) por i pyet ato melaqe të cilat kanë qenë në mbrojtjen e njeriut: Si i keni lënë robërit e Mi? Melaqet thonë: Kur kemi shkuar i kemi gjetur në namaz dhe kur kemi ardhur i kemi lënë në namaz.

Pyetje:

- 1. A ka melaqe të cilat e ruajnë njeriun nga fatkeqësia?*
- 2. Prej kujt na ruajnë melaqet?*
- 3. A ndërrohen melaqet të cilat e ruajnë njeriun?*
- 4. Kur të ngrihen melaqet në qiell për çka pyeten?*

MELAQET E AUTORIZUARA PËR TA VIZITUAR DHE KONROLLUAR TOKËN

Zoti i Madhëruar ka krijuar melaqe për ta vizituar tokën dhe për t'i kërkuar vendtubimet në të cilat përkujtohet Allahu.

Vendtubimet e përkujtimit të Allahut janë:

Vendtubimet e këndimit të Kur'anit dhe mësimit të tij, e mësimit të haditheve të Muhamedit a.s., vendtubimet e mësimit të hallallit dhe haramit, vendtubimet e tesbihut dhe istigfarit, vendtubimet e diturisë së dobishme.

Ebu Hurejra thotë:

Ka thënë Muhamedi a.s.: “Vërtetë Zoti i Madhëruar dërgon melaqe në tokë për të kontrolluar rrugët dhe për t'i kërkuar ata të cilët e përkujtojnë Allahun. Kur të takojnë popullin i cili e përkujton Allahun. (U thuhet): “Kërkoni çka ju nevojitet”, dhe i mbulojnë me krahët e tyre në qiell.

Zoti i Madhëruar e di por prapë i pyet melaqet:

- Çka thonë robërit e mi?

Subhanallah, Elhamdulillah, Allahu ekber.

- A më kanë parë?

Jo për Zotin nuk të kanë parë.

- Po si do të vepronin nëse më shohin?

Sikur të të shohin do të të adhuronin më shumë, do të të falënderonin më shumë dhe do të të lavdëronin më shumë.

Pastaj Zoti i Madhëruar i pyet melaqet:

- Çka kërkojnë prej Meje?

Kërkojnë Xhenetin.

- A e kanë parë atë?

Jo, për Zotin nuk e kanë parë.

- Po sikur ta shihnin?

Sikur ta kishin parë do ta lakmonin më shumë, do ta dëshironin më shumë dhe do ta kërkonin më shumë.

Pastaj Zoti i Madhëruar prapë pyet melaqet:

- Prej çka kërkojnë mbrojtje? Nga zjarrit (Xhehenemit).

- A e kanë parë atë?

Jo për Zotin nuk e kanë parë.

- Po sikur ta shihnin.

Sikur ta kishin parë do të frikoheshin më shumë prej tij dhe do të largoheshin nga rruga e cila të shpie atje.

Zoti në fund thotë: “Dëshmoj para juve se ia kam falur atyre gabimin”.

Njëra nga melaqet thotë: Në mesin e tyre është një njeri i cili ka ardhur për nevojë tjetër.

Zoti i Madhëruar thotë: “Ata janë një popull dhe të gjithë janë për një kuvendim”.

Nga ky hadith kuptojmë se Zoti i Madhëruar i do ata të cilët e përkujtojnë Atë, njëherit ata kanë vlerë të madhe te Zoti i Madhëruar.

Po ashtu ata të cilët e përkujtojnë Zotin i duan edhe melaqet.

Pyetje:

- 1. Cilat janë vendtubimet e përkujtimit të Allahut?*
- 2. Kush i viziton vendtubimet e përkujtimit të Allahut?*
- 3. Çka thonë melaqet kur ta takojnë popullin i cili e përkujton Allahun?*
- 4. Çka kuptojmë nga hadithi i cili tregon për popullin i cili e përkujton Allahun?*

MELAQET E AUTORIZUARA ME PREZENTUA NË NAMAZIN E XHUMASË

Namazi i xhumasë është namaz javor.

Çdo musliman duhet të shkojë në xhami ku tubohen dhe bashkohen të gjithë muslimanët për ta falur këtë namaz.

Në namazin e xhumasë shkojnë edhe melaqet për t'i shkruar emrat e atyre të cilët shkojnë me e falë këtë namaz dhe për ta dëgjuar ligjëratën e xhumasë.

Ebu Hurejra r.a. tha se Muhamedi a.s. ka thënë:

“Kur të vjen dita e xhumasë, në derën e secilës xhami qëndrojnë melaqet të cilat i shkruajnë ata të cilët hyjnë për ta falur namazin e xhumasë. Ai i cili shkon më herët ka vlerë më të madhe. Kur imami fillon ligjëratën (melaqet) i mbyllin regjistrat dhe e dëgjojnë ligjëratën”.

Pra, sa më herët të shkojmë në xhami për ta falur namazin e xhumasë, kemi shpërblim më të madh e sa më vonë të shkojmë kemi shpërblim më të vogël. Duhet që gjithmonë të shkojmë sa më herët në namazin e xhumasë që emrat tanë të jenë të shkruara në rreshtat e para të regjistrave të melaqeve.

Pyetje:

1. Çka duhet të bëjë muslimani në ditën e xhuma?
2. Çka shënojnë melaqet te dyert e xhamive në ditën e xhuma?
3. Çfarë shpërblimi kanë ata të cilët shkojnë më herët në xhami në ditën e xhuma?

MELAQET E AUTORIZUARA VETËM PËR NAMAZ

Zoti i Madhëruar ka autorizuar melaqet të cilat përcjellin muslimanin kur të falet me xhematë dhe bëjnë dua me ju pranua lutja e tij.

Thotë Muhamedi a.s.: “Kur të thotë imami: “Gajril magdubi alejhim veled-dalijnë” thuani **amin**. Pse **amin** thonë edhe melaqet, e kush thotë **amin** së bashku me melaqet i falen gabimet e mëparshme të tij”.

Pra nga ky hadith kuptojmë se duhet shkuar në xhami me u falë me imam për ta arritur shpërblimin e melaqeve sepse edhe ato së bashku me neve thonë **amin**.

Po ashtu edhe kur të ngrihet imami nga rukuja dhe thotë “Semi’allahu limen hamideh” thoni: “**Rabbena lekel hamd**” pse edhe melaqet thonë: “**Rabbena lekel hamd**” e kush thotë së bashku me melaqet i falen gabimet e mëparshme të tij.

Për këtë arsye namazi me xhematë ka vleftë të madhe. Vlefta e namazit me xhematë është **njëzetë e shtatë** herë më e madhe se me u falë vetëm.

Pyetje:

1. *Kush i përcjell muslimanët kur të falen me xhematë?*
2. *Çka duhet thënë kur të thotë imami në namaz: “Gajril magdubi alejhim veled-dal-lijnë”?*
3. *Çka fitojmë kur të falemi në xhami me xhematë?*
4. *Çka duhet të themi kur në namaz imami thotë: “Semi’allahu limen hamideh”?*
5. *Sa është vlera e namazit me xhematë më e madhe se sa me e falë vetë?*

MELAQET IU NDIHMOJNË BESIMTARËVE

Melaqet kryejnë punë të shumta. Disa mbajnë Arshin, disa janë rojtarë të Xhenetit, disa rojtarë të Xhehenemit, disa kujdesen për erërat, disa për furnizimin e gjallesave, disa janë mbikëqyrës të kodrave. Mirëpo prej punëve kryesore janë ato punë që kanë të bëjnë me besimtarët të cilët e adhurojnë vetëm Allahun, falin namazin, japin Zekatin, agjërojnë Ramazanin dhe e kryejnë Haxhin.

Pra, melaqet iu dalin në ndihmë besimtarëve në momente të vështira. Sikurse ka ndodhur në luftën e Bedrit kur melaqet kanë luftuar së bashku me besimtarët kundër jobesimtarëve.

Në luftën e Bedrit besimtarët ishin pak, të zbathur, të pambrojtur, ndërsa jobesimtarët ishin shumë, ishin të përgatitur mirë dhe të mbrojtur mirë, mirëpo Zoti i Madhëruar dërgoi melaqe me iu ndihmua për të korrur fitore.

Vërtetë ashtu ka ndodhur. Fitorja e Bedrit ishte fitore e besimtarëve ku iu kanë dalë në ndihmë melaqet.

Thotë Zoti i Madhëruar:

“Allahu ju ka ndihmua në Bedër, kur ju keni qenë të dobët dhe të pafuqishëm. Pra frikojuni vetëm Allahut që të jeni falënderues. Përkujto (o Muhamed) kur u thoshe besimtarëve: A nuk ju mjafton ndihma e Zotit tuaj me tremijë melaqe të zbritura (në mesin e juaj për ndihmë).

Po! Po! (Ju mjaftojnë). Nëse ata ju sulmojnë bëhuni të durueshëm dhe të dëgjueshëm dhe Zoti juaj menjëherë do të ju dërgojë në ndihmë pesëmijë melaqe të shënuar me shenjë të dalluar, Allahu e ka bërë kështu që t’ju përgëzojë juve dhe t’ju qetësojë zemrat e juaja se fitorja është vetëm nga Allahu i Plotfuqishëm dhe i Gjithëdijshtëm. Që grupet jobesimtare t’i shkatërrojë apo t’i turpërojë e të kthehen ata të humbur e të nënçmuar”.

Pyetje:

- 1. Kush i del në ndihmë besimtarëve në momente të vështira?*
- 2. Kush iu ka dalë në ndihmë besimtarëve në luftën e Bedrit?*

ALLAHU DËRGON MELAQE QË TË I SPROVOJ NJERËZIT

Kush duron në vështirësi dhe në probleme të cilat i paraqiten, Zoti i shpërblen me të mira. Kush e falënderon Zotin për të mirat që ia jep, Ai ia shumëfishon ato të mira.

Kur dëshiron Allahu që të dënojë ndokënd i cili punon punë të këqija, dërgon melaqe me i dënua, ose kur një popull vepron me padrejtësi Zoti dërgon melaqet për ta shkatërruar atë popull. Kështu ka ndodhur me popullin e Lutit a.s. Ai i këshillonte, i udhëzonte në punë të mira. Mirëpo populli i tij nuk e dëgjoi, për këtë arsye Zoti i Madhëruar dërgoi melaqet të cilat shkatërruan këtë popull. Po me të njëjtën mënyrë nëse dikush punon punë të mira Zoti dërgon melaqe me i dhënë atij të mirat e shumta.

Të shohim se si ka ndodhur me tre persona të një vendi ku njëri e kishte zgjedhën i dyti ishte pa flokë (tullac) dhe i treti i verbër.

Që të tre kishin të meta, që të tre ishin të vetmuar, nuk u ndihmonte askush por vetëm largoheshin prej tyre për shkak të sëmundjeve neveritëse të tyre, dhe për shkak të “papastërtisë” së tyre.

Allahu dërgoi një melaqe te ata për t’i sprovuar duke u dhënë atyre pasuri dhe duke ua larguar sëmundjet.

Melaqja shkoi te njeriu i parë:

- Çka dëshiron i tha?

Nuk dua asgjë pos të më shërojë Zoti nga kjo sëmundje dhe të kem pasuri sa për ekzistencë.

Melaqja e preki dhe ai u shërua nga zgjeba, pastaj i tha se Allahu të jep këto dy dele dhe ti prej tyre do të pasurohesh.

Pastaj melaqja shkoi te njeriu i dytë dhe i tha:

- Çka dëshiron?

Njeriu pa flokë tullaci i tha: Nuk dua asgjë tjetër pos të më shërojë Zoti nga kjo sëmundje dhe të kem pasuri sa për ekzistencë.

Melaqja e preki dhe ai u shërua nga sëmundja, pastaj i tha se Allahu të jep këto dy dele dhe ti prej tyre do të pasurohesh.

Në fund melaqja shkoi te njeriu i tretë dhe i tha:

- Çka dëshiron?

I verbëri tha: Nuk dua asgjë tjetër pos të më kthejë shikimin Zoti dhe të kem pasuri sa për ekzistencë.

Melaqja e preki dhe i erdhi shikimi, pastaj i tha se Allahu të jep këto dy dele dhe ti prej tyre do të pasurohesh.

Kaluan shumë vite ata u forcuan dhe u pasuruan pasi që Allahu i Madhëruar i kishte frymëzua delet të shumohen. Pas atyre viteve të shumta Allahu e dërgoi melaqen dhe e urdhëroi që të shndërrohet në formën e një njeriu të varfër, me rroba të vjetra që t'i sprovonë ata, a janë bamirës, a e falënderojnë Zotin dhe a u ndihmojnë nevojtarëve.

Në atë formë si i varfër melaqja kërkoi ndihmë prej njeriut të parë i cili kishte pasur zgjedhjen e i tha: “Jam udhëtar, kam nevojë për ndihmë, më jep diç prej asaj që të ka dhënë Allahu”!!

Ai e refuzoi dhe filloi t'i bërtas duke e qortuar. Në atë moment befasisht prej formës së njeriut të varfër u shndërrua në formën e melaqes së vërtetë dhe i tha: “Pasi ti nuk i njeh të mirat e Allahut dhe njerëzit nuk kanë dobi prej teje kthehu zgjedhkan siç ishe më parë. Dhe menjëherë u kthye në sëmundjen e mëparshme.

Melaqja vazhdoi dhe shkoi te njeriu i dytë si i varfër dhe kërkoi ndihmë prej tij. Ai u tregua më koprrac. Filloi t'i bërtas, ta ofendojë dhe ta largojë me forcë. Melaqja me shpejtësi u shndërrua në formën e vërtetë dhe i tha: “Kthehu në sëmundjen e mëparshme pa flokë (tullac)” dhe me urdhrin e Allahut u sëmur. Ai filloi të qajë dhe u pendua por pendimi i tij nuk pati efekt.

Vazhdoi melaqja me e provua njeriun e tretë. Kur shkoi te ai kërkoi ndihmë, u paraqit si i varfër, i gjorë dhe me rroba të vjetra dhe i tha: A keni diçka të më ushqeni se jam i uritur.

Ai me zemërgjerësi i tha: “O vëlla ti je i varfër dhe nevojtar. Por tërë kjo pasuri është begati prej Allahut, merr sa të duash dhe sa të kesh nevojë vetëm se për këtë falënderojë Allahun e jo mua”. Melaqja prej të varfrit u shndërrua në formën e vërtetë e tha:

“Ti je bamirës falënderues dhe i dobishëm për shoqërinë, për këtë arsye Allahu do ta shtojë pasurinë dhe do të japë shëndet të fortë përgjithmonë.

Përmbajtja:

BESIMI NË MELAQET E ZOTIT	7
CILËSITË E MELAQEVE	8
PUNËT E MELAQEVE.....	9
MELAQET E DALLUARA.....	10
ERR-RUHUL EMINË.....	11
MELAQJA E RISKUT (Furnizimit)	12
ISRAFILI.....	13
MBIKËQYRËSI I XHENETIT DHE I XHEHENEMIT	15
MELAQET E AUTORIZUARA PËR ME NA PYETUR NË VARR.....	18
MELAQET E AUTORIZUARA PËR MBAJTJEN E ARSHIT.....	20
MELAQJA E AUTORIZUAR PËR SHI	21
MELAQJA E AUTORIZUAR PËR KODRA.....	22
MELAQET E AUTORIZUARA ME BË LUTJE PËR BESIMTARËT.....	23
MELAQET E AUTORIZUARA PËR ME I SHËNUAR DHE REGJISTRUAR VEPRAT TONA	24
MELAQET E AUTORIZUARA PËR TA VIZITUAR DHE KONROLLUAR TOKËN	27
MELAQET E AUTORIZUARA ME PREZENTUA NË NAMAZIN E XHUMASË	29
MELAQET E AUTORIZUARA VETËM PËR NAMAZ	30
MELAQET IU NDIHMOJNË BESIMTARËVE.....	31
ALLAHU DËRGON MELAQE ME I SPROVUA NJERËZIT	32